



NON A LA CONSTITUCIÓN EUROPEA

Pola Europa de los derechos sociales y de los pueblos, ¡non a la Europa del capital y la guerra!

Refugamos el proyectu de Constitución Europea porque recorta abondo los derechos civiles, nacionales, sociales y políticos y representa un pasu atrás en comparanza coles llexislaciones (ya abondo probes) vixentes nos estaos qu'igüen la Unión. Ye una Constitución neolliberal, militarista y imperialista, que consagra la Europa de los Estaos, que refuerza la desigualdá de derechos y oportunidaes ente homes y muyeres, y que caltién un modelu de desarrollu qu'estroza'l mediu. El 9 de mayu que vien en Roma o nuna fecha posterior pero averada, los xefes de gobiernu van ratificar el testu.

Nós, que queremos otra Europa, la Europa de los trabayadores y de los pueblos, de los derechos sociales, de les llibertaes, democrática, solidaria, pacífica, non xenófoba y ecolóxicamente sostenible, refugámoslo por cómo se fixo y polo que diz:

Cómo se fixo:

La Convención Europea presentó un proyectu que:

- Nun se fixo a comuña cola sociedá civil, nin-y lo consultaron nin siquier la informaron: tolo contrario d'un procesu constituyente espresión de la soberanía de los pueblos.
- Tol secretismu que tuvieron colos ciudadanos convirtióse en comunicación fluida y coordinación colos lobbys empresariales con sede en Bruseles.
- En dellos países va sometese a referéndum y na mayoría esti resultáu nun va ser vinculante. Esti va ser el casu del Estáu español, onde, si se refrenda'l 13 de xunu, namás va ser una ratificación (o non) simbólica.
- Ye cuasi irreformable porque un solu país va tener derechu a vetar el determin de los otros veinticuatro. Esti sistema nun busca mayoríes cualificaes sinon minoríes de bloquéu.

Qué diz y qué nun diz:

1. Derechos civiles:

- El proyectu de CE obliga a caltener una política d'esteriores y seguridad común que los países tienen qu'apoyar de forma activa y ensin reparos. Crea l'Axencia Europea del Armamentu y afirma que cada país comprométese a ameyorar pasu ente pasu les sos capacidaes militares, asegura que los estaos de la Unión queden a les órdenes de la OTAN y aprueba los ataques preventivos. Llegalícense les declaraciones de guerra.

Las acciones armadas van dir primero que les explicaciones: va informase inmediatamente al Consejo de Seguridad y a las Naciones Unidas de cualquier agresión armada y de las medidas que se tomaron pa face-y frente.

- La cláusula "de solidaridá" fala de prevenir el terrorismu nos territorios de los estaos miembros y d'evaluar periódicamente los riesgos qu'amenacen la Unión, ensin definir en nengún casu'l términu terrorismu nin explicar cuál sería l'ámbitu d'actuación siguiendo la doctrina de la "cruzada contra'l mal" de George Bush.
- Créense la policía interno Europol y la fiscalía Eurojust que refuercen el control policial y la represión.

Pa toes aquellos persones que tamos en contra de la guerra y proponemos la renuncia definitiva y incondicional del usu de les fuerces armadas como instrumentu políticu, la CE nun pue ser un proyectu más gafu.

2. Derechos sociales:

L'articuláu nun garantiza de nenguna forma'l cumplimientu de los derechos sociales. Amás, al unificar países con niveles de protección xurídica d'estos derechos mui estremada, iguala los derechos sociales de los europeos a los niveles de los países onde estos tán más desprotexíos.

En nengún casu s'establecen los mecanismos coactivos qu'obliguen a los estaos a cumplir los derechos sociales. Hai derechos, como'l derechu a la salú, el derechu a la vivienda o'l derechu a un salariu abundu que nin se mienten y otros derechos remanecen devaluaos por una redacción interesada; asina existen:

- El derechu a trabayar, que nun ye'l derechu a acceder a un trabayu digne
- El derechu de la mocedá a que lo protexan de la esplotación económica y del derechu de les muyeres a que les protexan del despidu por mor del embaranzu. "Protexer" nun quier dicir nin garantizar nin prohibir.
- El derechu de huelga namás en negociaciones colectives y llimitada a les lleis restrictives de cada país. Esto estorba la convocatoria de la huelga xeneral europea.
- El derechu al accesu a los servicios económicos d'interés xeneral, qu'hasta agora se llamaben "servicios públicos", y que podra privatizalos llibremente'l gobiernu de cada país.
- Polo tanto, podemos dir despidiéndonos de les polítiques sociales en cuantes a educación, sanidá, servicios a les persones, pensiones de vieyera y d'invalidez y de la posibilidá de llogar una vivienda.

"Empara d'esto" dexa qu'haya pieslle patronal (lockout) por parte de los empresarios, les deslocalizaciones, etc..., garantizando la impunidá de les multinacionales, como yá tamos sufriendo.

Amás la Constitución encárgase de consagrar el derechu a la propiedá privada perrriba de los derechos sociales. L'únicu sistema económicu permitiú va ser la economía de mercáu de competencia abierta y llibre, y van seguir les desigualdaes de presupuestu, servicios y salarios ente los

países europeos porque'l sistema de seguranza social va ser al gustu de cada país. Amás, considérase la especulación económica una valía en sí mesma porque los capitales van poder circular llibremente, y va ser imposible aplica-yos nin la tasa Tobin nin nenguna otra.

La CE propón una política de déficit cero que quita de que se faigan polítiques sociales y de qu'haya plenu emplegu. Alcuerta tamién obedecer los dictaos de la Organización Mundial del Comerciú y sustitúi la investigación sobre la enerxía alternativo pol conceptu de "mercáu de la enerxía".

A efectos prácticos el poder económicu va tar perriba del políticu porque'l Bancu Central Européu (BCE), aparte de ser l'únicu autorizáu a emitir euros, va tener más poder que cualquier gobiernu estatal y, yá nun digamos, nacional o autonómicu. El BCE y el sistema de bancos centrales, igüen una organización xerárquica con poderes executivos, llexislativos y cola facultá d'imponer sanciones, quitos de cualquier control democráticu.

3. Derechos nacionales:

El proyectu de Constitución nun dexa a los pueblos d'Europa decidir llibremente'l so futuru porque nun recueye nin el derechu democráticu a l'autodeterminación, nin el derechu a la unidá territorial de les naciones ensin estáu, porque nin siquier les reconoz, y perpetúa les fronteres estatales vigentes.

- Namás nos vamos poder dirixir a les cinco instituciones europees nes 21 llingües estatales, ente les que nun s'inclúin el catalán, euskera, gallegu, asturianu,...de manera que nun dexa usar la llingua propia. Tampoco dedica nengún esfuerciu a defender los derechos xurídicos, culturales y llingüísticos de les naciones.
- Caltién l'orde colonial porque reconoz la rellación especial que tienen dellos estaos europeos coles sos ex-colonies que pasen a llamase países y territorios d'ultramar.

4. Derechos políticos

- Namás el Parllamentu, una de les cinco instituciones que la formen, va escoyese por sufraxu universal directu. Les otres cuatro van votase por delegación y nun van representar a los 25 estaos miembros sinón namás a 13 cada "llexislatura".
- Nun se va saber qué vota el/la delegáu/da y polo tanto nun se-y va poder pidir cuentas.
- Na práctica, el Parllamentu européu nun tien capacidá llexislativa y nun intervién na política exterior; el resultáu ye una perversión del sistema democráticu. La Comisión europea, anque ta escoyida de manera non democrática, va poder facer propuestas llexislatives y el so presidente va tener les funciones propies d'un réxime presidencialista.
- Europa tenía que tener una llexislación laica a tolos efectos, ensin referencia nenguna a ilesies, confesiones y relixones.

- Foméntase la xenofobia con una nueva categoría inferior de ciudadanu residente de llarga duración non comunitariu. Les fronteres europees van tar organizadamente vixilaes. La Europa fortaleza va ser un fechu.

Por too ello ta claro que tamos xugándonos el futuru. ¡Esto nun ye una constitución europea! ¡Ye un tratáu pa llexitimar el porgüeyu de les multinacionales contrariu al de los trabayadores y los pueblos d'Europa!

FIRMANTES: L'Arcu la Vieya, Bloque por Asturias, Coordinadora Ecoloxista, COSAL, CSI, IAS, MRG, Picu Rabicu, Mesa pola Defenssa de la Enseñanza Pública, Soldepaz Pacahkuti, SOS Racismu, SUATEA, Uviéu pola Paz